



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Komunikadu Imprensa
01 Dezembru 2020
Parlamentu Nasionál

**Governu Konstitusionál VIII inklui Orsamentu ba Implementasaun Polítika Jenéru
iha Programa Orsamentu 2021**

Governu Konstitusionál VIII Orsamentu Jerál Estadu (OJE) 2021 liuhusi Proposta Lei Nú.23/V (3^a). Totál orsamentu ne'ebé propoin ba iha Parlamentu Nasionál hamutuk billiaun US\$1,797.243. Área prioridade sira foka iha orsamentu ne'e mak hanesan dezvoltimentu kapitál sosiál, dezvoltimentu ekonómiku, ne'ebé aliña ho medida sira ne'ebé inklui ona iha Planu Rekuperasaun Ekonómika, dezvoltimentu infraestruturá bázika fundamentál nian sira, dezvoltimentu ambientál no dezvoltimentu institusionál.

Orsamentu tinan 2021 ne'e ho formatu orsamentu foun. Formatu orsamentu ne'e bazeia ba programa. Nune'e, iha OJE 2021 nian, instituisaun Estadu 14 mak aloka orsamentu ho programa atu implementa Polítika Jenéru.

“JSMP apresia aas tebes iniciativa Governu hodi inklui orsamentu ba implementasaun polítika jenéru iha programa Governu nian no ida ne'e konsidera hanesan pasu importante ida ba nasaun atu kumpri nia obrigasaun sira nu'udar nasaun membru ne'ebé ratifika ona Konvensaun Internasionál kona-ba Eleminasaun Diskriminasaun Hasoru Feto (CEDAW). Pasu ida ne'e nu'udar meu ida atu promove no elimina aktu diskriminasaun sira kontra feto iha instituisaun públiku sira no sociedade Timor-Leste,” dehan Diretora Ezekutiva JSMP, Sra. Ana Paula Marçal.

Instituisaun Estadu 14 ne'ebé aloka orsamentu ba programa implementasaun ba Polítika Jenéru kompostu husi Parlamentu Nasionál US\$77,000.00, Sekretáriu Estadu ba Igualdade no Inkluzaan ho totál orsamentu US\$2.554,000.00, Sekretariu Estadu Formasaun Profisionál no Empregu ho totál orsamentu US\$15,000.00, Ministériu Justisa US\$3,000.00, Ministériu Administrasaun Estatal US\$50,000.00, Ministériu Saúde US\$9,000.00, Ministériu Solidaridade Sosiál no Inkluzaan US\$427,000.00, Ministériu Planu no Ordenamentu ho totál orsamentu US\$15,000.00, Ministériu Transporte no Komunikaun ho totál orsamentu US\$10,000.00, Ministériu Defeza US\$73,000.00 (saláriu vensimentu no bens serbisu), FALINTIL-F-FDTL US\$20,000.00, Ministériu Interiór US\$23,000.00, PNTL US\$103,000.00 (bens serbisu no kapitál minór no Universidade Nasionál US\$89,000.00. Nune'e, totál orsamentu ba Programa implementasaun polítika jenéru hamutuk milliaun US\$3.468,000.00.

Entretantu iha parte seluk, JSMP mós husu bá Parlamentu Nasionál atu tau prióridade ba diskusaun OJE 2021 nian iha área importante sira hanesan Agrikultura, Turizmu,

Edukasaun no Saúde ne'ebé importante tebes ba hadi'a sustentabilidade rekupersaun ekonómia rai laran iha tempu pandemia Covid-19 nia laran.

JSMP husu ba deputadu sira atu hasai tiha verba orsamentu ba iten bens serbisu liuliu liga ho viazen estranjeiru sira tanba pandemia no instituisaun hotu seidauk bele halo viazen ba estranjeiru exeptu ba diplomata no funsionáriu diplomata sira. JSMP mós hanoin Estadu ka Governu persiza evita gastu deznesesáriu sira hanesan sosa kareta, viazen lokál, konstrusaun infraestruturáriu ne'ebé la nesesáriu no mós evita tau orsamentu boot ba instituisaun sira ne'ebé nia serbisu no funsionamentu temporáriu hanesan CNE ho STAE hodi koloka fila-fali orsamentu sira ne'e ba área prioridade ne'ebé JSMP mensiona iha leten.

Atu hetan informasaun liutan favór kontaktu:

Ana Paula Marçal
Diretóra Ezekutiva JSMP
Diresaun e-mail: ana@jsmp.tl
Website: <http://jsmp.tl>
www.jsmp.tl

Rua Beco Lakateu, Aldeia Manufuik,
SukuColmera, Administrativu Vera Cruz
Dili Timor Leste
PoBox: 275
Telefone: 3323883 | 77040735
www.jsmp.tl
luis@jsmp.minihub.org
Facebook: www.facebook.com/timorleste.jsmp
Twitter: @JSMPtl